

## Kálaad áβεε Pwôl nyá á cilə Timotê yé

**Isâ í d**úgyá nə kálaad áβεε mə Pwôl shú mə Timotê yí  
**Kálaad áβεε** mə Timotê ηgə nyîn nə Pwôl nyə á bə Róma  
 ja nyə á cilə nyə yí (1.17). Í á jəla nə bə Pwôl ηgə jág jug  
 mímbwugud (2.9) a músə a tál fwó (4.10, 16). Nda nyə á  
 mpu nə iséy byé í mə shín a wál zə yə nə (4.6), nyə á ka cilə  
 muud nyə á bə nyə fwámé múúd gwoonηg á ccelí yé (1.2),  
 yə nyə məcwûη.

**Pwôl mə** tééd fwo yə Zembî akíba nə búgə Timotê jî nə  
 ndí yí. Nda á bwey mpu nə obwiingye ó Jɔɔɔ Lâη bwé dɔ  
 jug, dɔ bwəma nə cúwúlí ná, a bándúló Timotê nə a yímúg  
 nyúul ja məkugulɔ mə bá yí, a gwána nda fwámé «mwâ  
 zimbi mə Krîst», lwóya íηkárη. (1.3–2.13). A mpú bándulə  
 nyə nə a jíig ncê nə buud bwé dɔ té mbeε ílís-lís nə ozhuyá  
 nə isâ í dɔ sá nə buud bwé wúg búgə dí wá. A mú ci ná  
 a bég yuug jé, nyə Pwôl, a dɔ cugə nda mílósú mí Zembî  
 mí ηgə ci ná, kú fúfug (2.14–4.5). A mú kə shínal kálaad  
 nə ηkánɔgúlá ηkánɔgula cé nyáméfwó tál yí, a ηgə lɔ Zembî  
 muud nyə á ηgə shúgal nyə yé (4.6–22).

**Pwôl ηgə** lwó nə nyə a mə gwána gwáná á kaambulələ  
 nə Jɔɔɔ Lâη nə ndeé kə wóós məshíné mə cug jé (4.7). A ηgə  
 jîη ja jêsh ná buud bwé lɔ kálaad éga wá bwé gwánág gwáná  
 jɔɔηgú kú nə ifwaas, nda fúndə mízhízhíη, ηgə gwána nə  
 búgə, nə jísów, nə ccelí, nə nadâ.

### Məbádá

<sup>1</sup> Mə wé ηgə cilə kálaad éga, mə Pwôl. Zembî nyə a  
 jîη ná mə bég \*muud lwámá mə \*Krîst Yésus, shú nə mə  
 bwíngug buud cug nyə á kaag nə a bá yə bwo wé Krîst

Yésus yí. <sup>2</sup> Má cilə wo Timotê mwân waam má búl cɛɛl yé. Zembî Sóóŋgá bá Cwámba wúsú Kríst Yésus bwé ó sá wo mpaam, bwé ó gwág wo cey lámúd, bwé ó sá námá né wo cúgəg mpwogé.

*Pwól ŋgə* yə Zembî akíba

<sup>3</sup> Mə ŋgə yə Zembî ódá bwé á də yə gúmá yé akíba. Nyə námá wé má ŋgə yə gúmá mitédúgá myâ lâm mí njúl mə fúbán yé. Má də wá wo módí məjəgula dí ja jêsh, tɔɔ ibulú tɔɔ mimwásó. <sup>4</sup> Mə ŋgə bul tédugá yé dwô, mə ka ŋgə bul jii ná shwá dúgyág mə búlug bə nə məshusug. <sup>5</sup> Mə ŋgə téduga búgá gwô, búgá á kú nə məkəŋ, búgə ŋgwúd nə ŋgwúd mpáámbə gwô Loyís bá nyɔɔŋgá woó Enís bwé á bə nə ndí yí. Mə ŋgə mpu búbálé né búgə jɔɔŋg námá wé wó jí nə ndí yí.

*Maguləg jug shú Jɔɔɔ Kéel*

<sup>6</sup> Gwé wá má bándúlá wo ná: ŋgagú nə gwíŋŋ sâ Zembî nyə á yə wo ja má á bəd wo məbwé yí. <sup>7</sup> Nəcə \*shíshim Zembî nyə á yə shé yí í cúgé shíshim ífwaas; í yidá bə shíshim í də sá né muud búlug bə nə ŋkul, nə cɛɛlí, a də jwú nə lâm yé yí. <sup>8</sup> Ntó má kə né wo ajéláyé nə gwág shwôn nə ŋgələ bwiŋŋ lân má Cwámba íshé tâm buud, wo nda námá gwág mə shwôn nda má jí mímbwug dí nó. Yidagú magulə né wo júgug námá nda mə shú Jɔɔɔ Kéel, shwá ŋgə \*búgula ŋkul má Zembî. <sup>9</sup> Nəcə nyə wé nyə á cug shé, a jôw shé ná shé bəg buud bé; nyə a shígé jôw shé ntó ná shé á fwo sá jɔɔɔ mísóólúgú, í á bə nji nəcé nyəmfwó nyə á ŋwa cígúlá né a sá shé mpaam. Nyə á bwey cɛɛlə shé mpaam nyɔɔŋg kwoŋ mə \*Kríst Yésus dí, shí ga nda fwo tééd. <sup>10</sup> A

1:2 Timotê: 1Tm 1.2; 1Kr 4.17    1:3 Flp 3.5; 1Tm 1.5    1:5 Mís 16.1    1:6  
bəd wo məbwé: 1Tm 4.14; 5.22    1:7 Rom 8.15    1:8 2.9; Rom  
1.16    1:9 Ifz 2.8-9; Tit 3.5    1:10 Yuá 1.14; Tit 3.6 shwiy ... cug jí kú  
bá bwele shîn yí: 1Kr 15.20, 55, 57; Heb 2.14-15

má ka lwó shé mpaam nyɔɔŋgú ja gaád nɔ zálɔ cɔgye íshé Kríst Yésus nyɔ á zɔ lwóya nyúúl yí. Nyɔ wé nyɔ a mé zɔ caam ŋkul shwiy í á dɔ bɛ nɔ ndí yí, a zɔ nɔ Jɔɔɔ Kéel zɔ sá nɔ shé mpúg cɔg jí kú bá bwele shîn yí.

<sup>11</sup> Jɔɔɔ Kéel dɔɔŋg wé Zembî nyɔ á tâl mɔ nɔ mɔ ŋgég nɔ bwiing yí, mɔ bág \*muud lwámá, mɔ bɛ nɔ zhí mɔ jíííí búúd. <sup>12</sup> Gwá wé mɔ ŋgá jisɔw minjugú yí; nji mɔ agwágé myo shwôn, nɔcé mɛɛ mɔ mpú múúd mɔ á mɔ búgula yé; mɔ mpú búbálé nɔ a ji nɔ ŋkul mpu baagalɔ sá jêsh mɔ yé nyɔ nɔ a báágulɔg yí, mɔ kɔ bá ŋwa gwo jwôw á mɔzhúgúlâ.

<sup>13</sup> Iciyá yâ obúbálé wó á lág nɔ mɔ yí, ŋwag byo tâŋ yuug, ŋwag byo nɔ búgá nɔ cɛlí í ŋgá zhu wé Kríst Yésus yí. <sup>14</sup> Sâ wo á yíɔw yí, wo ó baagalɔ gwo nɔ kwíindyá mɔ ŋkɛŋkɛ Shíshim njúl shédí yé.

<sup>15</sup> Wo mpú nɔ buud ɔ Azî bêsh bwé á mɔ myaas mɔ, tɛɛm bɔ Fízhêl bá Erumozhên. <sup>16</sup> Cwámba gwágúg njów búúd mɔ Onezifôr cɛy lámúd. Nɔcé nywáá nyɔ á dɔ wá mɔ ŋkul nyúúlúd, kú gwág mɔ shwôn nɔ mɔ jí mímbwugud. <sup>17</sup> Nyɔ á yida ŋgá sɔ mɔ nɔ zény ja nyɔ á wóós Róma yí, a mú kwey mɔ. <sup>18</sup> Cwámba Yésus sáág nɔ Zembî bág gwág nyɔ cɛy lámúd jwów á mɔzhúgúlâ. Wo ntâg wé mɔ búl mpu bímbí lú kwíindyá nyɔ á kwíind mɔ Ifêz yí.

## 2

### *Pwôl ŋgɔ cwîny mwân yé*

<sup>1</sup> Mwân waam, ság nɔ mpaam mɔ \*Kríst Yésus í lúlushig wo! <sup>2</sup> Sâ jêsh wó á gwág mɔ á jíííí zhwoɔ owúshined bwé njúl yí, kalagú gwo, yɔ búúd wó mɔ dúg nɔ bí abúgúlág wá, bân bwé bág nɔ ŋkul mɔ jíííí bóólúgá búúd. <sup>3</sup> Jísówúg

dwó kow lá mínjugú tâŋ nda fwámé zimbi mə Krîst Yésus.  
<sup>4</sup> Muud ŋgə sêy séy ízimbi yé, ja á ceel ná mása yé gwágúg  
 nyə nywa yí, nyə ádé na nyiŋgə kənd lám zhizhe ísád.  
<sup>5</sup> Bwə du bwéed ŋgwiimbe igwiimbî \*tûm gúmá nji ja á  
 ntɔ̄ nda máccɛ mə ígwiimbí mə cí ná. <sup>6</sup> Mbɛyɛ mæmpəg  
 nyə á wáduga yé, nyə wə mə jálá nə fwo tééd mwáágulə  
 mpúmá. <sup>7</sup> Faasúg ísâ mə ŋgə cí yí, Cwamba nyə e sá ná wo  
 wámbúlóg byêsh.

<sup>8</sup> Wo ɔ tádúgá Yésus-Krîst nyə á byêl mpwoŋ buud mə  
 \*Dávid dí, nyə á gwûm yé. Jɔjɔ Kéel mə ŋgə bwiing wə ni.  
<sup>9</sup> Mə ji mímbwug dí nda zhiŋŋaanə nəcé mə ŋgələ bwiing  
 Milású mí Zembî myɔɔŋg. Nji, mə tɛem bə mímbwug  
 dí, muud cugé nə ŋkul wóɔlə Milású mí Zembî mənəkəda.  
<sup>10</sup> Gwə wə í sá ná mə ŋgəg nə jísəw ísâ byêsh, shú nə buud  
 Zembî nyə a féesh wá bwə bíg cug Yésus nyə á zə nə ndí  
 yí, bwə ka bá bə nə milwanə mí ábúle bwele shîn yí. <sup>11</sup> Ciyá  
 ábúgúlág jí ná:

Ŋkí shénòŋ Yésus shé á yə,  
 shénóŋ mə bá námə nyiŋgə cugə.

<sup>12</sup> Shé mə ká yím mónyúúl,  
 shénóŋ ka bá jwú.

Shé mə ká kílya nyə,  
 a bá námə kílya shé.

<sup>13</sup> Shé mə ká bə kú sá sâ á cí yí,  
 nywáá bə námə nji abúgúlág,  
 nəcé a cugé nə ŋkul kílya nyáméfwó.

*Wo ŋgə sêy mísh mə Zembî dí*

<sup>14</sup> Báásúlóg búúd ísâ íni. Yímbúlíg bwo mísh mə Zembí  
 dí ná bwə bág kú du bɛ dúlə bigas íciyá ná ndéé mbigas kə

---

2:5 4.7-8    2:8 Rom 1.3-4; 1Kr 15.4    2:9 1.8; Ifz 3.1; Flp 1.12-14    2:10  
 Rom 5.2; Kol 1.24    2:11 Rom 6.8    2:12 Mat 10.32-33; Rom 5.17    2:13  
 Rom 3.3-4    2:14 1Tm 1.3-7; 6.4; Tit 3.9

nyɛ ózhuyâ. Sâ jɔɔŋg í akwííndé tɔɔ sâ, í yida kweemushi búúúdwé gwágulə wá. <sup>15</sup> Wáág ŋkúl né wo dúg nyîn mísh má Zembî dí né wo má ntɔ məkugulə, wo ji sóól məsáal cúgé nə sâ shwôn yé, sóól məsáal ŋgá bwiiŋg búbálé má Zembî mbií í jála yé. <sup>16</sup> Wo nda dɔ kənd məlwə mbeé zhizhe mikaand mí ŋgá lúmbali nə búgá myáád. Buud bwé dɔ lás mbií mikaand myɔɔŋg wá bwé bá ŋgə kə nji shwóg-shwóg nə Zembî. <sup>17</sup> Iciyá byán í bá dɔ də búúúú nda fəŋ ŋkwaambá í dɔ də múúú nyúúú ná. Imene bá Filét bí mbií búúúú wɔɔŋg. <sup>18</sup> Bwé ŋgá jaaw buud nə gwúmúshilə sə ŋgá ci ná Zembî mə bá gwúmushi búúúú yí í á má bwey bæ. Ja bé ŋgá ci ntó yí, bwé mə shwáda wú óbúbáléd kə koogú, bwé ŋgə sá ná bóól búúúú búgá í shwágúság.

<sup>19</sup> Nji, tɔɔ jí tɔɔ jí, lal-lal lámuga Zembî nyə lúm yí, jáá jí ná námé né shîm; Zembî nyə á cilə cínɔŋg lámuga jɔɔŋg dî né: «Cwámba mə mpú búúúú bí búúúú bé wá», a nyiŋgə námé cilə né: «Muud yêsh mə dɔ kámɔ Cwámba yé mə jəlá nə béégya nə olíŋgî».

<sup>20</sup> Njɔw mə fwámé múúúú í ádé bæ nji nə ishúyá bwé á lúlə nə or ŋkí ntág kwóógú bwé dɔ lúlə \*mwaanê nə ndí yí; í dɔ námé bæ nə byɔɔŋg ísâ bwé á caag nə ilí yí, nə byɔɔŋg bwé á mɛ nə yagá yí. Bíl bísə byɔɔŋg bwé dɔ balan nə ndí məfwála mə gúmá dí yí; bílúgá, bwé dɔ balan nə ndí ja í cúgé fwála gúmá yí. <sup>21</sup> Muud mə myáás bów-bôw mínjígúálá mə ámə ŋgə ci míni yé, nyə é bæ shúyá gúmá. Muud wɔɔŋgú nyə é bæ ŋkəŋkə múúúú, a bæ nə mfíí shú má Zembî muud njɔw, a bæ kwéésha ná búə nə ŋkul balan nə nyə shú wúl jɔjɔ sóólúgú wêsh.

<sup>22</sup> Túbúg íyéésh í ŋgá bul julə məsás nə mənɔcwámá yí; wo yida sɔ né wo cúgəg cug á tútəlí, cug búgá, cug cɛəlí,

cug á ná shee. Binôñ buud bwé ñgá jôw Cwámba nã milâm fúbán wá, bi cágæg gwo nã lâm wêsh. <sup>23</sup> Dugú ban sêñúsálã búúd bwé ðã sêñusa mákâł kú nã wúmbúlé nda mikás yí. Nacé sêñúsálã mákâł wãñgú í ábweyé nã ðã shúgala ózhuyâ. <sup>24</sup> Í ñjúl ná sół mäsáal mã Cwámba nyã ajóláyé nã ðã bæ nã ozhuyâ, á jëlã nã yidã bæ nã osusa nã muud yêsh, a ðã mpu jíguli búúd, a ðã bæ nã jilálã lâm. <sup>25</sup> A jëlã nã ðã sã ná, bãñg bwé sã nyã oñkwafad wá, a cwíny bwo ná shee, a ñgá bwánd ná ka Zembî nyã é yã bwo fwála ná bwé cëndúg mítédúgá ná ndéé bwé zã mpu óbúbálé, <sup>26</sup> bwé mú nyingã bii fwámé mítédúgá ná ndéé bwé mú cugya wú ñkwaang mã Njwû mãjamb dí kál nyã á wá bwo mímbwug myéd ná bwé dúg gwág ñji nã nyã yí.

### 3

*Bów-bôw ísã í bá sîy mwów mã mãzhúgúlã dí*

<sup>1</sup> Mpug ná mwów mã mãzhúgúlã ði, mól máfwála má bá bæ ñkí lal cug. <sup>2</sup> Nacé buud bwé bá bæ nã ibî, bwé bul cêl \*mwaanê. Bwé bá bæ nã bægwa, bwé ðã ñkêny mányúul, ðã \*lãs nã Zembî bwaasúlã mpu, sã obyðl bán mælwê, nda ðã lÿ mánywa, kú gwóñ Zembî. <sup>3</sup> Bwé bá bæ nã ñkúd, bwé ábúle ðã magulã juu búúd, bwé bá ðã sã íkúðúgú, ðã sã ísã nã jwuñ, ðã bæ nã mãnyaan, kú cêl mánywa. <sup>4</sup> Bwé bá ðã bæ ñgwól kusha ñgwól, ñgwól kusha ñgwól, bwé bá bæ nda bwé cúgé nã milúu, ðã jág ñkêny mányúul, bwé bá cêl máshweesh má cug ntõ Zembî. <sup>5</sup> Bwé bá ðã nyîn nda buud bwé ñgá gwóñ Zembî wá, ñji bwé nda mpu ñkúl má Zembî í ðã cënd búúd yí. Wo ã bá ðã tãw búúd bãñg shwóg-shwóg.

2:23 2.16    2:24 1Tm 3.3; Tit 2.7-8    2:25 1Tm 2.4    3:1 1Tm 4.1; 2Pr 3.3; 1Yn 2.18; Yúd 18    3:2 Gal 5.19-21    3:5 Mat 7.15, 21; Rom 2.19-20; Tit 1.16

<sup>6</sup> Bóól bəəŋg bwə də kyey nə minjígúlá myánj mǐnjǒw minjǒw; budá bwə ŋgə wádɔga nə kúdá lú \*misəm, íyéesh mimbií mimbií í ŋgə kə nə bwo cê kə nə bwo cê wá, bwə də biil mǐnjígúlá myəəŋg dí, nda óshû bwə də biil ŋkwaəŋg dí ná. <sup>7</sup> Búsə nji bwə ó də ŋwa mǐnjígúlá, nda ka bwele mpu óbúbálé. <sup>8</sup> Némə nda Zhanés bá Zhambres bwə á lúmbuli nə Moyíz ná, ntó námə wə óyíguli bəəŋg bwə ŋgə lúmbuli nə obúbálé yé. Mitədúgá mí mú bwo oncúg-nculé mílúúd, jáŋ búgə í á má yə íyíy-yíy. <sup>9</sup> Nji, sódúgú wánj í ábálé bugəban, nəcé buud bēsh bwə é mpu ná bāŋ bwə ŋgə cəgə íwushí dí námə nda íwushí í Zhanés bá Zhambres í á mpúy ná.

*Nadagú* ni isâ wó á jíig mǎdí yí

<sup>10</sup> Wεε gwó kóómb di, wo á bε minjígúlá myâm, wo ŋwa kuú njəənd wâm, wo mpu íyuug mə ŋgə yigula yí, nə búgə jám, nə cəg mə ŋgə cəgə kú nə milámusa yí, nə cεlí jám, nə zény mə jí nə ndí shú kələ shwóg yí. <sup>11</sup> Wo mpú nda búúd bwə á wáám mə nə cúwúlí ná, wo mpú bímbí jugúlə mə á jug Antyósh nə Ikóniyum nə Lístrə yí. Byáyé ífuməga mə áshígé jíəw yí? Nji, isâ íni byēsh í á tεem ŋgə wáám mə, Cwámba nyə á ŋgə sá nə mə fááməg. <sup>12</sup> Mpuɡ nə buud bēsh bwə céél cəgə cəg í yə Zembî gúmá kwoŋ mə Yésus-Kríst wá bwə bá bwəma nə cúwúlí. <sup>13</sup> Nji, bəəŋg bí mímbúwúlú wá nə bəəŋg wā məshígá bwə bá yida ŋgə jág bul sá məbǔw, bwə ŋgə yíl bóól búúd zhíd, bwəməfwo bwə ŋgə námə yílow.

<sup>14</sup> Wεε gwó kóómb di, nadagú nə isâ wó á jíig wo magulə nə lâm wə yí; wo mpú ntág buud wó á jíig isâ byəəŋg bwədí

---

3:6 Tit 1.11      3:8 MmN 7.11, 22; 8.3, 14; 1Tm 6.4-5      3:10 Rom 16.24;  
 1Tm 1.5      3:11 Mis 13.50; 14.5; 14.19 jugúlə mə á jug: Sòm 34.20;  
 2Kr 11.23-29      3:12 Mat 16.24; Yuá 15.20; Mis 14.22; 1Te 3.3      3:14  
 2.2; 1Tm 1.10

wá. <sup>15</sup> Wó bwey mpu Micilyá mí Zembî tééd ná wo njúl mwántombú. Micilyá myɔɔŋg mí nə ŋkul sá nə muud bág nə fɔg shú cɔg búúd bwé ŋgá bii nə búgúlálə Yésus-Kríst yí. <sup>16</sup> Zembî wé nyə a lwó buud cilyá wêsh bwé á cilə yí; ntó, cilyá wêsh wúsə nə mffí shú jígúílə búúd obúbálé, nə bágúílə íwushí, nə ságúlə yíl búúd íwushí dî, nə jígúílə búúd cɔg á tútəlí, <sup>17</sup> shú nə muud má Zembî bág nə ŋkul kwag sâ jêsh, sá nda fúfə nyə shú sálə sólúgú wêsh wí ŋkí nywa yí.

## 4

*Timotê bwiingug* Jɔɔɔ Kéel

<sup>1</sup> Má ŋgə lás nə wo mísh má Zembî bá Yésus-Kríst dî. Mə lás nə wo, námə nda \*Kríst Yésus mə bá nyingə zə ná, námə nda á bá zə sámə búúd milésú tɔɔ mímbimbə tɔɔ mikuwó ná, námə nda á bá zə təl íjwúga byé ná. <sup>2</sup> Mə lás nə wo ná, cúndəg Ciyá má Zembî, báásúləg tɔɔ fwála í jəla, tɔɔ í ajəlayé; dɔgú lwó búúd iwushí byán, dɔgú jum, dɔ cwîny; isâ íni byêsh dí, kú nə milámusa, wo mbíd nji yéesh jígúílə. <sup>3</sup> Nəcé dúl fwála í bá bə, buud bwé ábúle ná dɔ cɛɛl gwág fwámé njígúílá. Bwé bá yidá dɔ bɛ íyéesh byán, dɔ sɛɛŋgya nə oyígúli bwé dɔ jaaw bwo isâ í dɔ lugə bwo málwád yí. <sup>4</sup> Bwé ábúle ná dɔ kənd málwə obúbáléd, bwé bá yida dɔ gwágulə míkaanə. <sup>5</sup> Nji wɛɛ dɔgú cunal iyéesh byô ja jêsh, wo ɔ jísów micún, wo ɔ wá nyúúl bwiingúle Jɔɔɔ Lánúđ, sá ísɛy byô mbií í jəla yí.

<sup>6</sup> Mɛɛ mú nda cúdú bwé zé cígə yə Zembî \*mətúnuga yé, wəla lú njɔɔnd dâm í mé wóós. <sup>7</sup> Mə á mə gwána jɔɔɔ gwáná, mə mə casulə kúlá mə á ŋgə ju yí, mə a mə baagúle

3:15 Yuá 5.39; Rom 15.4; 1Tm 4.13; 2Pr 1.21      3:17 2.21      4:1 Mis 10.42;  
2Kr 5.10; 1Pr 4.5      4:2 Mis 20.20, 31; Tit 1.13      4:3 1Tm 1.10; 4.1      4:4  
1Tm 1.4      4:6 Flp 2.17; 2Pr 1.14      4:7 1Kr 9.24-25; Flp 3.12-14; 1Tm 1.18



búgá. <sup>8</sup> Tééd kíkídíga, \*tûm gúmá í músə mə ηkwəməsá, tûm gúmá í lwó ná Zembî mé ci ná mə ji tútəlí yí. Cwám̄ba, muud jí sém̄bye milésú atútəlí yé, nyə wə mə bá yə mə yuug jɔɔŋg jwôw dɔɔŋgúđ; nyə abúle yə nji mə, a bá námə yə bɔɔŋg bēsh bwə ηgə cɛel ná a nyíŋgəg zə wá.

### *Isâ í lâm*

<sup>9</sup> Wáág ηkûl ná wo lálug zə kwey mə. <sup>10</sup> Démas mə myaas mə nəcé a jág bul cɛel cug á mwôw mága. Nyə a mə kə Tesaloníka, Kresáns mə kə Galátia, Titus kə Dalmatí. <sup>11</sup> Nji Lúkas wə sá bí wa yé. Wo ɔ ηwa Márkus zə nə nyə, nyə é zə kwíind mə ísáyúđ. <sup>12</sup> Mə a mə kənd Tishik Ifêz. <sup>13</sup> Ja wó bá zə yí, wo ɔ bá zé nə mə káándé yôŋ mə á lúgə Truwás wə Karupus yí; wo ɔ bá námə zə nə okálad, bul bə ná ndéé bɔɔŋg bí síyá nə ikúúđú í cúđú wá.

<sup>14</sup> Aləguzándrə álúlə mikwambé nyə á bul sá mə məbôw. Cwám̄ba mə bá yə nyə myəna myâ misóólúgú myé. <sup>15</sup> Wo ó du námə káálugə nə nyə, nyə á bul lumbuli nə kéel dású.

<sup>16</sup> Jwôw mə á tééd kə shwɔ nyúúl mpáánzə milésú yí, mə a shígé bə nə muud mə kwíind mə, buud bēsh bwə á myaas mə. Zembî kə juu bwo nə bów-bôw sóólúgú wəŋ wɔɔŋgúđ.

<sup>17</sup> Nji, Cwám̄ba nyə a shí kwíind mə, nyə á ləlushi mə mbií á ná mə á bwiŋg kéel dé dēsh, mə sá ná ikûl ishús byēsh í gwágúg dwo. Nyə a tí yíl mə mājə mə zhwambánkwuŋ đí.

<sup>18</sup> Cwám̄ba nyə e bá námə du yíl mə bíl ísâ í məbôw byēsh đí, a mú bá sá ná mə kəg nyíi Faan dé á gwówúđ kú shwúg jús kú bwiim bɔɔgú. A bəg nə gúmə kandugə á kandugə! Amen.

### *Məbədə*

---

4:10 Flp 2.21 Démas: Kol 4.14; Flm 24; 1Yn 2.15; Tit 1.4      4:11 Lúkas: Kol 4.14 Márkus: Kol 4.10      4:12 Tishik: Kol 4.7-8      4:13 Mis 20.6      4:14 Mat 16.27 Aləguzándrə: 1Tm 1.20      4:16 1.15      4:17 Dan 6.21; Sôm 22.22; Mis 1.8; 23.11      4:18 2Kr 1.10; Flp 1.19-20

<sup>19</sup> Wo ɔ bédá mæ Priska bá Akilas næ njów búúd má Onezifôr. <sup>20</sup> Erâst nyə a lúg Kòrênt, mæ a lúgə Trofîm Milêt a ngá kwas. <sup>21</sup> Wáág ñkûl né wo zég ñkwân nda fwo zə shí. Næ Ibulus næ Púdens næ Línus næ Klodía næ bóól bwááŋg bêsh bwé ngə báda wo. <sup>22</sup> Cwám̄ba jíg næ \*shíshim wô! Zembî ké sá bí mpaam.

---

4:19 Priska bá Akilas: Mis 18.2 Onezifôr: 2Tm 1.16-17  
19.22; Rom 16.23 Trofîm: Mis 21.29

4:20 Erâst: Mis

4:22 Gal 6.18

## Kálaad Zembî : Sə́ á Gúgwáan New Testament in Makaa

copyright © 2014 Wycliffe Bible Translators, Inc.

Language: Makaa

Translation by: Wycliffe Bible Translators

Contributor: Wycliffe Bible Translators, Inc.

### Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Makaa

**© 2014, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

